


Sang President  
Henry B. Eyring  
Sounsawas Keieu nan  
Presidensi Keieu



# Kapai Kan en Meiroang en Eisek Kis Ehu

**K**upwur en Koht ni ketkiheng kitail kosonned akan iei en kapaikitailda. E kupwurki ketkiheng kitail mour poatoapoa, me keieu laud nanpwungen Sapwellime kisakis kan koaros (tehk D&C 14:7). Pwehn alehdi kisakis en mour oh patoh pahn Kupwur kohkohlahte nan peneinei kan nan wein celestial, kitail udahn anahne momourki kosonned akan en wehio (tehk D&C 88:22).

E ketkihiengkitailehr kosonned kan nan mour wet pwehn seweseikitail kakairada koahiek en kapwaiada met. Kosonned en meiroang en eisek kis ehu iei ehu kosonned pwuko mehn kaunop. Kosonnedo iei me kitail en patohwanong Kauno eisek kis ehu en mwohni koaros me kitail alehdi. Wen mengei kosonned wet seri pil kak wehwehki. I kilangehr serihkan kiheng pisop enpelop en meiroang en eisek kis ehu me audaudki eisek kis ehu en sent mwaramwer kan me re kin alepweipweiki.

Ehu kapaikan me kin kohdo sang ni pwain meiroang en eisek kis ehu ni unsek iei kakairada pwoson en mourki kosonned ehu me ahpwete ilehsang. Pwehn mour nan wein celestial, kitail udahn anahne mourki kosonned en kasarawi. Wasao kitail udahn anahne kak en pehm me mehkoaros me kitail wia oh

mehkoaros me kitail ahniki wia sapwellimen Koht.

Mie sohte malaulausang wiepe siluh me pwain meiroang en eisek kis ehu ni unsek nan mour wet pahn kaunopkin kitail en *kehn* dahme kitail anahne kehn pwehn alehdi kisakis en mour soutuk.

Keieu, ni ansou me kitail kin pwain atail meiroang kan ong Mwomwohdiso, Samatail Nanleng kin widedkihdo kapai kan pohtail. Sohte lipilpil aramas me kin wie pwapwainte ni unsek meiroang en eisek kis ehu pahn ese me met mehlel. Kapai kan kin ekei pak doke pali ngehn oh ekei pak doke paliwar. Irait kin kohda ni sapwellimen Kauno ansou oh ni duwen me E mwahngih iei keieu mwahu ong kitail.

Ni kapai pwuko ahr kin kohdo, atail pwoson kin laudla me Koht iei utun mehkoaros me mwahu nan atail mour kan. E kin ahpwete mengeila en kilang me kasarawihla ni mengei iei en pohnese mehlel me sapwellimen Koht kapikipik kan koaros iei Sapwellime. E kin wiahda kitail en *kehn* kalahngan me ihte me E ketin poahngoangki iei pali eisek kis ehu en dahme E ketkihiengkitailehr. Pwe kitail en ahpwete kaunop en momourki kosonned en kasarawi ni ansou me e pahn poahngoangkihong kitail.

Keriau, kitail koaros me kin wie pwapwainte

meiroang en eisek kis ehu ni unsek *kin kehn* laud-lahn soupeikasal en peki rehn Koht dahme kitail oh atail peneinei kan anahne. E ketin inouki kapai kan me laudsangete me kitail kak alehdi ni atail kin loaloapwoatohng atail inou en pwain atail meiroang kan (tehk Malakai 3:10). Eri ehu kapai lap kan en meiroang en eisek kis ehu iei soupeikasaliki dahme mour en ehu rahn kolokol. Sohte lipilipil irair kan me kitail mihmi loale, soang kan pahn pweida ong me keieu mwahu. Ni atail pahn kolokol atail inou kan, E pahn ketin kolokol Sapwellime. Pepehm en meleilei iei ehu kapai lap kan en pwapwain meiroang en eisek kis ehu ni unsek. Irail akan me kolokolehr kosonned en meiroang en eisek kis ehu kak kadehde me kapai kan en meleilei mehleh oh kesempwal.

Kesiluh, irail akan me kin pwain meiroang en eisek kis ehu *kin kehn* kalaudlahn arail limpoak ong Koht oh ong koaruhsiehn Sapwellimen Koht serihkan. Kalaulawo en limpoak kin kohdo sang wehwehki duwen Sahmo eh kin ketin doadoahngki meiroang kan me kitail kin kihda ong kapaiada aramas akan nan mour wet oh ong mour soutuk.

Sang ni Sapwellime sounpapah kan me e ketin kiheng mweimwei, E kin ketin doadoahngki meiroang kan ni keneinei laud. Me kin pwain meiroang en eisek kis ehu kin sewese Kauno kawada tehnpas sarawi kan, wasa me peneinei kan kin katengtengpene soutuk. Me kin pwain meiroang en eisek kis ehu kin sewese Ih kadarala rongamwahuo ong aramas wasa koaros. Me kin pwain meiroang en eisek kis ehu kin sewese Ih apwaliala duhpek oh lokolok ni pein Sapwellime koasoandi sang ni Sapwellime sounpapah kan. Sohte lipilipil sounpapah pwuko kak ndahieng kumwail duwen limpoak eh kalaudla pwehki meiroang en eisek kis ehu eh doadoahk pwehn kapaiada aramas. Oh me kin pwain meiroang pil kak iang nda met.

Ansoun tuhkiheng pisop meiroang iei sounpwong kei sang ansou wet. I kapakapki me kumwail oh amwail peneinei pahn tepida met en koasoanehdi oh kaunop en warohng kapai kan me Koht kin ketin widekihdieng pohn koaruhsiehn irail akan me kin kak patohwanong Ih me irail kin iang pwain meiroang en eisek kis ehu ni unsek.

---

## PADAPADAHK SANG NAN IREN MAHSEN WET

- Ekei pak wiepe me keieu mwahu en padahk tepin padahk ehu iei en kasalehda (tehk *Teaching, No Greater Call* [1999], 164). Medewe peki rehn emen tohn peneinei en karasahda dahkot eisek kis ehu. E kak kasalehda met sang ni katohre dipwisou pwoat sang nan pwungen dipwisou eisek. Pwehn keimwsekala, medewe luke emen tohn peneinei en kasalehda duwen audehda kisin likoun meiroang de tithing slip.
- "Irail akan me komw kin padahkih pahn paieki ahn emenemen eh towehda koasoai"

(*Teaching, No Greater Call*, 63). Luke tohn peneinei en ehukihda dahme re kamehlele iei wehwehn ahn President Eyring mahsen "*kin kehn* dahme kitail anahne kehn pwehn alehdi kisakis en mour soutuk." Medewe koasoai wiepe siluh me pwain meiroang en eisek kis ehu kin kaunop kitail en kehn dahme kitail anahne kehn pwehn alehdi kapai kan en Koht.

## ME PWULOPWUL KAN

### Uwen Mwohni Itar

Sang Fabiano dos Santos de Silva

I tuhweng misinerihko ni ansou me I sounpar 17. Ni ansou riei pwutak me mahsang ie oh ngehi kin mihmi-pene. Aht nohnohu mehla sounpar mwoweo, oh mour me apwal. Ni ansou me misinerihko padahkihie, I kak kilang me Mwomwohdiso iei mwohkinin me I kin wie raparapahki. Ahpw kaweid en iengeikan kauhiehdih-sang kohla sarawi ni Rahn Sarawi kan.

Ehu ansou I kolahng kemwekid ieu en Mwomwohdiso nan likopen wihk ieu. Kilikilang pwulopwul kan koaros kokouruhr oh mwadmwadong wadohngie peren lap. Misinerihko, iangahki me pwulopwulko, doadoahngki ansou mwahuo en padahkihengie padahk ehu en rongamwahuo, oh uwen ei nsenamwahu I koasoanehdi ien pepdaisla.

Ahpw lella mwurin ei towehla Mwomwohdiso, I sohpaikahpwal kan. Ngehi kelehpw wia tohn Mwomwohdiso nan aht pali en kahnimwo oh I kin kousoan dohsang ihmwo sarawio. Iengei ko me sohte kin towe sohla men patehngkinie sohte lipilipil. Ni ansou me I

kehn me I kelehpw, I kin kapakap oh kehn limpoak en Kauno.

Ehuehu sounpwong, I kin alehdi kisin uwen mwohni kis sang sent ehu me ahi nohno kihdiengie. E apwal en kamauriki pein ngehi soangen tikitik en mwohnio. Ahpw I koasoanehdi me I pahn peik. I pwain meiroang en eisek kis ehu oh pil anahne pwain peidaid ong seminary oh mihting kan en Rahn Sarawi. I sohte wehwehki ia duwe, ahpw ni imwin sounpwongo, I diarada me mwohnio itar en pwainla koaros.

I ese me I kapaida pwehki ahi pwain meiroang en eisek kis ehu. Peikiong kosonned wet seweseie alehdi kadehde me ahpwete kehlaila, papah nan misin, oh kasawiada kapai kan pwe ien kak kakehlailih towe kapw kan me sosohpai kahpwal akan.

## SERIHKAN

### I Kak Pwain Meiroang en Eisek Kis Ehu

**P**wain meiroang en eisek kis ehu wehwehki kihda eisek kis ehu en dahme kitail alehdi ong Kauno. Medewe seri silimen wiewia doadoahk siluh me wekpeseng. Medewe me emen wiahda \$1, emen tohrohr wiahda \$2, oh seri kesilimeno wiahda \$3. Ntingihdi ia pahn uwen meiroang en eisek kis ehu en emenemen serihko.

Peidek tohrohr: Mehnia nanpwungen irail me pwain meiroang pwukat pahn alehdi kapai me keieu laud? (Sawas: Tehk keimwseklahn parakrahp en iren mahsen en President Eyring.)



Pwoson • Peneinei • Sawas

# Kakehlailih Peneinei Kan sang Uhtohr me pid Paliwar

*Onopiki iren mahsen wet, oh ni duwen eh pahn konehng koasoatahkihieng lih akan me komw kin pwarek. Doadoahngki peidek kan pwehn seweseikomwi kakehlailih riomw lih akan oh pwehn wiahda Pwihn en Sawas en Lih en wiahla pali kesempwal en pein ahmw mour.*

**K**akairada uhtohr—koahiek en Kapwalih pein kitail oh atail peneinei kan—iei pwukoa en ememen lih. Kitail kin uhtohrda ni atail kin esehla poakohng doadoahk, ni atail kin rapahki kamarain pwehn diarada wiepe me keieu mwahu en apwalih pein kitail, oh ni atail kin iang towe kan en atail peneinei doadoahk pwehn apwialiala anahn kan.

Ni atail kin uhtohr, kitail kin doadoahngki atail kapai kan oh elen pai kan pwehn kaunopohng oh wetsang kahpwal akan. Ahpw, uhtohr kin kamwahula ni atail kin kapakapki soupeikasal en apwialiala ni pwoson kahpwal akan me uhdahn pahn kohdo. Uhtohr pil kin elehieng atail kak kolokol atail inou kan en apwalih mehteikan.

Nan Pwihn en Sawas en Lih, kitail kin padahk tepin padahk kan oh koahiek kan en uhtohr. Lih akan kak esehla duwen apwalih mwohni, pwainla pweipwand, warohng doadoahk, pwuhk sarawi kan oh rongamwahuo, padahkihieng mehteikan en esehla wadawad oh en kasukuhl, misihn de dipwisou kapw kan, roson mwahu, kakehlail paliwar, soikala wini oh soahng suwed akan oh mwahula mwurin pitisang, roson mwahu en pali en lamalam oh ehuong

mehteikan, doarehla soumwahu, wie mwetuwel, padok mwonge oh nahk mwonge, kaunop ong ansou karuwaru, oh soahng tohto teikan me pahn seweseikitail en ahpwete kak uhtohrda.<sup>1</sup>

Julie B. Beck, President lap en Pwihn en Sawas en Lih, kawehwe me “apwalih pein kitail oh mehteikan iei kasalepen me kitail iei tohnpadahk en Kauno Sises Krai. . . Ni ansou me [ahn ei pwoud nohno] mehla karuwaru sounpar ahpwete imwiseklahro, sansal lipwen eh mour me uhtohr. E kolokol kisin likoun mweimwei ong nan tehnpas sarawi me manaman oh pwuhk sarawi kan oh pwuken onop rongamwahuo me kalapw doadoahk. Se nehkpeseng ni limpoak nah ainpwot kan, oh dahl akan me e kaunopkihda kiden mwonge loale. E kihdieng kiht tehi mosul me e wiahkihsang likou mering. E kamehlele lepin mahsen en mahso ‘Doadoahngkihla, doadoahngki lao ohla, wiahda pwehn kak doadoahk, de nantihiengete ni omw sohte ahniki.’ Se kilang mwonge me e padokedi oh kukihieng nan pwoatol, oh nahk. Me inenen sair kiht iei nah kisin pwuken rekoht kan me e kilelehdi ni loaloapwoat ah netinet kan erein sounpar tohto. Pwehki eh momour

ni kasohtik, mie mwohni me e nekidala ong ansou karuwaru kan, oh sohte ah pweipwand e kihdi! Me keieu kesempwal, e padahkihieng oh kasairehki tohto mehteikan ah koahiek kan me e esehla erein ah mour loaloapwoato.”<sup>2</sup>

## **Sang Nan Pwuhk Sarawi Kan**

Sohn 13:34–35; Seims 1:27; Mosiah 4:26; Doctrine and Covenants 29:34–35; 38:30; 44:6

## **Sang Atail Poadoapoad**

Lih akan en Pwihn en Sawas en Lih kin ansou koaros towehda doadoahk en doarehla ngehn akan ni me pid paliwar iangahki pali ngehn. Nan ehuehu wihk ni Female Relief Society of Nauvoo ahr kin tuhpene, lih akan kin repwohtki duwen lih akan me mie arail anahn. Sawas akan en mwohni, dipwisou, koahiek kan, oh ansou kin kohpeseng pwehn apwialiala me anahn. Doadoahk poahsoan wet en kamaiauihada lokolok doulahr pwehn wia doadoahk en Pwihn en Sawas en Lih erein dih kan kohkohdo.

Ni ansou me Souleng kan leledo nan Wahu en Salt Lake, President Brigham Young (1801–77) kaweidih lih akan en sewese irail akan me anahn oh esehla koahiek

kan me pahn mweidehng irail en apwalih pein irail. E nda, “Esehla kamaurih pein kumwail; nahk wahn pilawa oh pilawa amas, oh nekidala ong ehu rahn en apwal.”<sup>3</sup> Pahn kaweid en priesthood, Pwihn

en Sawas en Lih kin doulahte nan padahk duwen uhtohr, duwen sile peneinei, oh duwen kangoange mour pwung en emenemen oh mwekid kan en limpoak mehlel, limpoak unsek en Kraiss.

#### **IREN SAWAS AKAN**

1. Tehk *Handbook 2: Administering the Church* (2010), 9.4.2.
2. “The Welfare Responsibilities of the Relief Society President,” *Basic Principles of Welfare and Self-Reliance* (2009), 6.
3. *Teachings of Presidents of the Church: Brigham Young* (1997), 231.

**1.** Ia duwen ei kak sewese riei lih akan oh arail peneinei kan kamwahuiala arail uhtohr ni me pid anahn akan en paliwar de pali en momour?

**2.** Ia duwen ei kak kamwahuiala pein ahi uhtohr me pid paliwar?

Pwehn alehdi iren sawas kapatapat, kohla ni [www.reliefsociety.lds.org](http://www.reliefsociety.lds.org).